

Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit Namminersorlutik Oqartussat nalunaarutaat (Immikkoortoq 1)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, aamma 12 b, aamma 29, imm. 2 malillugit aalajangersarneqarpoq:

Atuuffiata killilerneqarnera

§ 1. Nalunaarummi §§ 3 aamma 4 katersuunnernut naalakkersuinikkut allatulluunniit isummersornissamik siunertalinntut atuutinngillat.

Imm. 2. Nalunaarummi § 5 napparsimavinnut, nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfearqartitsiffiusunullu atuutinngilaq.

Imm. 3. Nalunaarut ulluunerani neqeroorutinut namminersortunut pisortaniillu pigneqartunut, atuarfinnun, ilinniarfeqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

Imm. 4. Nalunaarut eqqartuussisut pissaanermik atortitsinerannut atuutinngilaq.

§ 2. Avataaniit tikittut Covid-19-imut tamakkiisumik akiuussutissamik kapitinnikuullutik uppernarsaasinnaasut § 3-mut imaluunniit § 4, imm. 3-mut ilaatinneqanngillat.

*Aaqqissuussinernik il.il., peqataaniarnermi nunanit allanit tikittunit peqataaffigineqarsinnaasunik
inerteqquteqarneq*

§ 3. Illup iluani silamilu aaqqissuussanik, nalliuttorsiornerik, sammisaqartitsinernik assigisaannilluunniit ingerlataqarnerit, nalinginnaasumik aaqqissuussamut peqataaniarnermi nunanit allanit tikittunit peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaattorli § 2 takuuk.

Imm. 2. Ullut 14-nit siulliit aaqqissuussani, nalliuttorsiorneri, sammisaqartitsinerni assigisaanniluunniit peqataanissamut nalunaarnissamik piumasaqaatilinni inuit nunanit allaneersut imaluunniit naalagaaffeqatigiinninngaanneersut aaqqissuussamut, nalliuttorsiornermut, sammisaqartitsinermut

assigisaannulluunniit peqataasussatut nalunaarsorsinnaannginnissaat aaqqissuussisup qulakkiissavaa, taamaattorli § 2 takuuk. Imm. 1 malinneqarpat, taava aaqqissuussaq il.il ingerlanneqarsinnaavoq.

Imm. 3. Pikkorissartitsinerit, isumasioqatigiinnerit assigisaallu taamatuttaaq imm. 2-mi ilaapput.

Imm. 4. Namminerisamik aaqqissuussat, soorlu assersuutigalugu kuisitsinerit, inuuissiornerit, apersortinnerit, soraarummeertoqarneranut atatillugu nalliuottorsiortitsinerit, katinnerit ilisinerillu imm. 1-imi aammalu 2-mi ilaanngillat.

Aaqqissuussinernut il.il kommuninit allanit angalalluni peqataaffigineqartussanut piumasaqaatit

§ 4. Illup iluani silamilu aaqqissuussat, nalliuottorsiорnerit, sammisassaqtitsinerit assigisaalluunniit nalinginnaasumik aaqqissussanut peqataaniarnermi kommuninit allanit angalaqqarluni peqataaffigineqarsinnaasut taamatulluunniit naatsorsuuteqarfingineqartut inerteqquaapput, taamaallaat piumasaqaatit tulliuttut malinneqarpata ingerlanneqarsinnaapput:

- 1) Aaqqissuussineq il.il. Nunatta avataaniit Kalaallit Nunaannut angalanermi piumasaqaatit pillugit Namminersorlutik Oqartussat nalunaarutaanni § 12, imm. 1 naapertorlugu tikittarfimmi aalajangersimasumi pisussaappat.
- 2) Aaqqissuussineq il.il. sioqqullugu ulluni 30-ni illoqarfimmi aaqqissuussamik ingerlatsiffiusussami Covid-19-imik tunillatsittoqarsimanngippat.

Imm. 2. Aaqqissuussami il.il. inuit 50-it sinnerlugit peqataassappata aaqqissuussinerup il.il. ingerlanneqarnera sioqqullugu aaqqissuussisoq allakkatigut ingerlariaatsimik piareersaassaaq ukulu qulakkiissallugit:

- 1) Inuit, Covid-19-imillu tunillatsissimanermik ersarittumik ersiuteqarpata, aaqqissuussanut il.il. peqataatinneqaqqusaanngillat.
- 2) Peqataasut minnerpaamik 2 miiterinik ungasitsiginissaat, tamanna aaqqissuussinerup ingerlanneqarnissaanut akornutaanngippat.
- 3) Aaqqissuussinerup siornani imaluunniit peqataanermi, peqataasut ilaat Covid-19-mik tunillatsissimaneranik pasitsaassaqartoqarpat, Corona allattoqarfia piaartumik attavigineqassaaq.

Imm. 3. Aaqqissuussanut il.il. peqataanissamik nalunaartariaqartunut, aaqqissuussisup qulakkiissavaa inuit peqataaniarlutik nalunaarusuttut tassunga ilanngullugit oqalugiartut, ilinniartitsut il.il., Kalaallit Nunaannut aaqqissuussineq sioqqullugu ullut 14-nit iluanni tikissimappata aaqqissuussamut peqataasinnaannginnissaat nalunaarsinnaannginnissaallu, taamaattorli § 2 takuuk.

Imm. 4. Aaqqissuussamut il.il. peqataasut tamarmik peqataareernerup kingorna, illoqarfimmi Covid-19-imik tunillatsittoqarsimasoq paasineqarpat, angerlannginnerminni misissortissapput.

Imm. 5. Aaqqissuussamik il.il. aaqqissuussisuusup aaqqissuussap il.il. nalunaarummi matumani malittarisassat tamaasa naapertorlugit ingerlanneqarnissaa qulakkiissavaa.

Imm. 6. Taamatuttaaq pikkorissartitsinerit, isumasioqatigiinnerit assigisaallu imm. 1-5-imi ilaapput.

Imm. 7. Namminerisamik aaqqissuussinerit, soorlu kuisitsinerit, inuuissiornerit, apersortinnerit aamma soraarummeertoqarneranut atatillugu nalliuottorsiortitsinerit, katinnerit ilisinerillu imm. 1-imi, 2-mi 3-milu ilaanngillat.

Imm. 8. Nunatta Nakorsaaneqarfia imm, 1-5-mut immikkut akuersissuteqarsinnaavoq, pissutsinik piviusunik tamanna tunngavilersorneqarsinnaappat.

Ininut kikkunnilluunniit iserfigineqarsinnaasunut piumasaqaatit

§ 5. Inuit aamma inatsisit naapertorlugit ingerlatsiviusut, tassunga ilanngullugu pisortat oqartussaaffi aamma suliffeqarfii, ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaneqarfianiit paasissutissanik nivinngaasoqassaaq.
- 2) Sulisut tamarmik Nakorsaneqarfieuq eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 3) Pisisunut pulaartunullu ajornangippat imermik qaqorsaammillu imaluunniit assammut spritimik ersittoqassaaq.
- 4) Nerisasanik poortorneqarsimannngitsunik tuniniaanerni sulisut aaqqateqassapput.

§ 6. Inuussutissarsiummik ingerlatalik politiit naliliinerat malillugu § 5-imik unioqqutitsisimappat, inuussutissarsiummilla ingerlatalik § 5-imik malinninnissa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaanik politiinit peqquneqarsinnaavoq.

Pineqaatissiissuteqartarneq

§ 7. §§ 3-5-imik unioqqutitsisoq imaluunniit § 6 malillugu peqqusummik unioqqutitsisoq pinerluttulerinermi inatsit malillugu pineqaatissinneqarsinnaavoq.

Imm. 2. Pinerluttulerinermi inatsimmi kapitali 5-imi aalajangersakkat malillugit ingerlatseqatigiiffit il.il (inatsisitigut pisinnaatitaasut) pinerluttulerinermi inatsisitigut akisussaatinneqarsinnaapput.

Imm. 3. Akileeqqusissutit Nunap Karsianut tutsinneqassapput.

Atuutilersitsineq, atorunnaarsitsineq piffissarlu atuuffissaq

§ 8. Nalunaarut 1. juuni 2021-mi atuutilissaq.

Imm. 2. Ilutigisaanik Katerisimaartarnernut, ininut kikkunnit tamanit iserfigineqarsinnaasunut assartutinullu killilersuigallarnerit pillugit Namminersorlutik Oqartussat nalunaarutaat nr. 17, 7. maj 2021-meersoq (Immikkoortoq 1) atorunnaarsinneqarpoq.

Imm. 3. Nalunaarut malillugu killilersuinerit, inerteqquteqarnerit, peqqusinerit il.il. 30. juuni 2021 ilanngullugu atuutissapput.

Namminersorlutik Oqartussat, ulloq 21. maj 2021

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut